



Era claustras ston far uorden

AUGUSTIN BEELI/FMR SURSILVAN

Gl'uorden dallas soras **dominicanas** da Glion exista dapi 1865. En quels 161 onns ei bia serimnau e s'emplunau en magasins. La populaziun ha giu interess – e marveglias – da mirar da tgei caussas che las soras han vuliu sedistaccar.

Rauba veglia ha la claustra buca presentau sonda vargada. Igl ei plitost rauba che survescha **vinavon** ad enzatgi. El tenercasa, pil hobi ni per distracziun. Per exempel plattas fonograficas da musica classica. Talas han ins era saviu acquistar alla fiera da plugls dalla claustra da Glion. Naven dallas 10.00 tochen las 16.00 ha la populaziun saviu visitar ina fiera ch'ei dat buca mintga gi. Sch'ina claustra venda sias «caussas pintgas», sveglia quei gl'interess. En entgins onns vegnien ellas a bardigliar en localitads novas e perquei stoppien ellas sedistaccar da quei e da tschei, haveva la claustra annunziat en sia comunicaziun.

Bia dallas casas serradas Tgei caussas ch'ellas hagian exponiu e tgeininas che seigien venalas han tschiens persunas vuliu veser. Sonda allas 9.30 ei ina colonna da visitadras e visitaders seformada el foyer dall'aula. Ina squadra da gidontras haveva exponiu sin meisas tut quei ch'ins s'imaginescha d'in tenercasa. Ina mes'ura pli tard ein las portas s'aviartas. «Quella 'beautycase' hai jeu duvrau aunc ier», ha sora Ida manegiau

cun fatscha da rir. Igl ei stau ina sgnocca. Tgei tut ch'il comité d'organisaziun dalla fiera da plugls haveva priu ord ils magasins dalla claustra saveva ella buc. Sora Friedburga era buc. Quella sora ch'ei dapi 1958 commembra dalla congregaziun ha giu plascher d'entupar glied e da discuorer cun quella. Era sora Placida e sora Ermelinde ein stadas presentas ed han salidau la glied. «Quei ei bein ina biala e buna caschun da s'entupar», ha la priura generala, sora **Annemarie Müller**, remarcu en connex culla fiera da plugls. Pertuccont l'acziun da sedistaccar da caussas mundanas, objects da decoraziun e rauba dil tenercasa ha ella manegiau: «Nus essan ina gronda casa, ed en quella ei bia serimnau.» Sco ella ha explicau alla FMR, eis ei rauba ch'ei vegnida ella casa materna el decuors dils davos 50 onns. Ils davos decennis han las soras da Glion stuiu serrar l'institut s. Giusep ed era las filialas en Svizra, Austria e Tiaratudestga. Da quellas casas deriva bia dalla rauba ch'ei stada exponida sonda. In altar ed in ambo

«Igl ei per bia aunc buca tut», ha ina gidontra tradiu. Instruments, sco per exempel ina scatla pleina cun flautas, lu ghitars, schizun entginas citras, bia vasas, vischala e maletgs originals che soras han fatg en lur temps liber ein i en mauns novs. Era cozzas da tuttas grondezas e musters, batlinis, statutas pintgas, candeliers e crucifixs han ins viu.

Buca mo caussas pintgas, era pli grondas ein stadas en vendita. Aschia gl'altar e gl'ambo dalla caplutta dalla scola da puras. Quellas duas mobiglias ecclesiasticas ha il graficher, sculptur e concepider da baselgias Alois Spichtig (1927-2014) fatg ils onns navonta per incumbensa dalla claustra da Glion. Ussa ein caplutta cun altar ed ambo danvonz, pertgei la casa dalla scola da puras ei integrada en in project da baghegiar niev.

Era pliras vitrinas e scaffas, schizun in harmonium mecanic ed in clavazin ein stai venal e pudessen survir a novs intents. Sco las soras han getg, vulan ellas cuntinuar cun talas fieras da plugls. Pertgei mintga gada eis ei ina caschun da s'entupar e da vegnir en contact in cun l'auter. FOTO MAD

La Quotidiana
7007 Chur
081/ 255 52 52
<https://www.suedostschweiz.ch/laquotidiana>

Medienart: Print
Medientyp: Tages- und Wochenmedien
Auflage: 3'130
Erscheinungsweise: täglich



Seite: 7
Fläche: 45'792 mm²



Auftrag: 3009371
Themen-Nr.: 140008
Referenz:
67a53871-a9b6-487f-8595-925f351dfb1e
Ausschnitt Seite: 2/2



La claustra da Gllon ha fatg fiera da plugls sonda vargada.